

ROTARACT CLUB TA ORGANIZA CONFERENCIA INTERNACIONAL NA ARUBA

ORANJESTAD (AAN) -- Rotaract Club ta un organizacion internacional di clubnan di servicio pa personanan entre 18 y 31 aña di edad. E meta di Rotaract ta pa desaroya habilidadnan di profesionalismo y liderazgo, identifica y desaroya comprendimento di necesidad, problema y oportunidadnan den comunidad.

Otro meta di Rotaract ta pa brinda oportunidad na su miembronan pa organiza proyectonan pa su comunidad local y internacional. E movimiento Rotaractiano a worde funda na aña 1968 na e estado di North Carolina, Estados Unidos. E aña aki Movimiento Rotaractiano a celebra su di trinta Aniversario.

Actualmente tin 6700 club di Rotaract na mundo cu un miembresia di aproximadamente 155.000 persona.

Na Aruba Rotaract a worde funda na aña 1990. E club aki actualmente tin 14 miembro activo y un grupo di ex-miembro y amigonan di e club cu semper ta contribui na e diferente proyectonan di e club. Rotaract Club di Aruba anualmente ta organiza e proyecto pa muchanan di schoolnan basico: "Ban School Bek" y e proyecto di macuto di Pasco: "Duna un Man na Bo Ruman". Tambe Rotaract ta contribui anualmente na un "Vakantie Camp" den tempo di vacacion.

Pa finaliza e diferente proyectonan aki, Rotaract ta organiza actividad diverso pa recauda fondo y semper ta ricibi bon contribucion di algun comerciante y en particular e pueblo Arubano.

CONFERENCIA INTERNACIONAL

Di dia 26 pa 29 di juni venidero, Rotaract ta organiza un conferencia internacional cu tayera "Rotaract USCC Conference 1998". Esaki ta un conferencia na unda clubnan di Rotaract di e region Mericano, Canades y Caribense por participa pa intercambia idea, siña di topiconan di liderazgo, motivacion y teamwork. Aruba ta e prome Isla Caribense cu lo bay organiza e conferencia aki.

Pa e conferencia di USCC, Rotaract a haya contribucion di profesionalnan manera Juliet Chieuw di Aruba Quality Foundation, Jose Menendez di Business Transformation Strategies, Belkis Monroe di Holiday Inn, Bernice Schulte di Fundacion Respeta Mi, Cristel Croes di Bureau Arends y Arthur Kelly di Playa Linda, y e conocido atleta Kenneth Club.

Rotaract Club di Aruba a haya e tremendo cooperacion di e profesionalnan aki, cu pa medio di e conferencia di USCC tambe lo duna nan aporte na nos comunidad. E conferencia ta worde organiza den Aruba Marriott Resort riba e dianan ya mencionan.

Tema di e Conferencia ta: "Thirty Years Hand in Hand for a Better Future". Door cu tin algun miembro di Rotaract di merca y Canada ta bay participa den e conferencia, e idioma den cual e lo worde brinda ta Ingles.

META DI E CONFERENCIA



Durante di e conferencia e participantenan lo dedica un tiki tempo pa wak bek riba e ultimo trinta añanan di e movimiento; lo analiza e situacion actual y principalmente pa medio di e diferente tayernan lo siña y intercambia idea con lo por logra e metanan di e club na un forma mas efectivo.

Un conferencia manera esaki ta brinda e miembronan di Rotaract y otro interesadonan e chens pa discuti y intercambia di idea, riba e diferente posibilidadnan con nos por contribui pa nos por tin un mehor mundo mañan.

ROTARACT SU VISION
Rotaract Club di Aruba a formula un vision. Rotaract su vision ta pa mehora e calidad di bida di e hubentud Arubano. Hopi biaha nos hubentud ta worde critica pero masha tiki biaha tempo ta worde dedica na nos hubentud pa asina comprende nan (inquietudnan, nan problemanan, etc), mehor pa asina analiza con nos lo por contribui pa crea un ambiente mas sano den cual nos hubentud por desaroya su mes.

Ta di suma importancia pa un persona y un organizacion tin un vision, pesey Rotaract kier comparti esaki cu e Rotaractianonan cu lo bishita nos isla pa atende e conferencia y otro interesadonan cu ta desea di siña un tiki mas di e concepto aki. E importancia di tin un vision aki lo ta e punto di salida di e conferencia. Pa esaki Rotaract lo haya asistencia di e conocido profesional Sra. Juliet Chieuw. Den otro articulo DIARIO ta elabora mas riba e conferencia aki.

Fundacion fondo pa monumentonan cu venta ceramica di Makkum



ORANJESTAD [AAN] A yega di sali publica e anuncio cu "Tichelaars Koninklijke Aardewerkfabriek na Makkum, (un pueblo na Frislanda, Hulanda), ta liquida tur nan producto existente".

Un bon chens pa esnan cu ta gusta e losanan aki, pasobra ya ta 3 siglo caba cu e empresa aki ta fabrica e famoso articulonnan di losa cu a bira famoso pa nan estilo pinta na man, di calidad excelente, pero no di un prijs cu tur hende por paga. Ora cu e noticia a plama tur cu tabata desea pa obtene tal obra a core bai mesora pa cumpira na un prijs relativamente rebaha.

Tabata cuenta di awor of nunca! Loke ta haci e obranan di Makkum famoso ta e hecho cu nan ta traha cu e mes receta di antaño di 300 aña pasa y pinta na man, cada un, asina cu ningun ta mescos.

Na Aruba ainda tin un lote chikito di e tayanon famoso di Makkum cu ta representa

algun monumento Arubano. P.e. Fort Willem III, Oficina di Shell (antes na Eagle) cu awor ta e edificio di AHATA, y tambe e forno di kalki den Ranchostraat.

Awor e tayanon di Makkum ta costa Afl.600.- pa un. Ta parce hopi placa, pero no lubida cu e cantidad ta limita, y cada un tin nan number. Pa esnan cu ta colecciona ta un oportunidad pa realsa nan coleccion.

E tayanon famoso y unico aki ta ser bendi pa Stichting Monumentenfonds Aruba, Zoutmanstraat 1, Oranjestad, cu ta habri tur dia di trabao for di 8'or di mainta te cu 4'or y mei di atardi. Number di telefoon pa informacion y reservacion ta 827564.

E fundacion tin pa tarea mantene, cuida y conserva patrimonio nacional y ta trata pa adquiri algun fondo necesario pa cumpli cu esaki. E ganashi di "tayanon famoso di Makkum" ta bai pues pa sigui restaura monumentonan na Aruba.

Recordatorio na Pueblo

ORANJESTAD [AAN] Esaki ta un recordatorio pa Prome Diasabra y Prome Diadomingo di Luna. Tur devoto di Sagrado Curazon di Jesus y Inmaculada Curazon di Maria y henter pueblo di Arubá ta keda cordialmente invita pa un Santo

Sacrificio di Misa na Misa di Playa pa 7'or di anochi. Despues di Misa lo tin un Santo Rosario Scritural y adoracion propio di Cristo den Santisimo Sacramento. Laga nos vigila y resa rumannan pa un conversion di

curazon, haciendo reparacion pa nos picanan, pa Señor manda su bendicion abundante pa cada un di nos, pa nos famianan y pa mundo henter.

E vigilia lo caba cu un bendicion di Santisimo Sacramento 3:30 diasabra mardugá, sigui pa un procesion cortico cu Santo Rosario y lo caba cu un Misa na honor di Mama Maria den hardin di Mama Maria mes.

TELEFONNAN DI DIARIO
826747- FAX 828551